


## ALAHADY FAHA-4 MANDAVANTAONA D



### « Tsy ny zanak'i Jôsefa va ity? » (Lk. 4: 22)

Ry Kristianina havana, tena ao anatin'ny fivelomana ny mandavantaona tokoa isika izao izany hoe vanimpatoana amin'ny fandalinam-pinoana, katolika aho ka alaliniko izay inoako. Tsy hoe alalinina fotsiny ka hikombona irery fa ho tahaka an'I Jesoa tao an-tempoly nilaza hoe "Ato amiko ny Fanahin'ny Tompo, hirahinao hitory ny vaovao mahafaly aho" izany no namaranantsika ny fandalinam-pinoana tamin'ny Alahady lasa faha 3 teo. Amin'izao Alahady faha 4 izao dia miditra lalindalina isika, miantso antsika Andriamanitra mba hampiombona ny olona rehetra satria Andriamanitra araka ny lohahevitra alalinintsika androany dia "Masoandro be lohataona ny fitiavan'Andriamanitra ka tsy mifidy olona hosoavina" izany hoe miantso antsika ho olo araiky ao aminy Andriamanitra. Tsy mikombona ny finoana, katolika aho ka zaraiko izay inoako, katolika aho

ankalazaiko izay inoako. Ry Kristianina havamalala, miantso antsika tokoa Andriamanitra, miantso olona hijoro vavolombelona hanambara amin'ny manodidina ny fitiavan'Andriamanitra izay lazain'i Md Paoly amin'ny vakiteny faharoa, fa io fitiavana io no lehibe indrindra satria raha nahary antsika Andriamanitra, nahary antsika

Vakiteny I Jer. 1, 4-6. 17-19  
Tononkira : Salamo 70  
Vakiteny II : 1 Kôr. 12, 31—13, 13  
Evanjely : Lk. 4, 21-30

hitovy endrika aminy. Andriamanitra dia fitiavana. Ny hanahafantsika an'Andriamanitra dia fitiavana ary averimberin'ny Soratra Masina izany fa indrindra i Md Joany " Raha mitia isika dia eo anivontsika Andriamanitra" matoa mikorontana sy tsizarizary ny fiainantsika dia satria tsy eo anivon'ny fiainantsika izany endrik'Andriamanitra izany. Araky ny henontsika amin'ny vakiteny voalohany, nantsoin'Andriamanitra I Jeremia ka nirahiany eo anivon'ny mpiara-belona aminy ho mpaminany ho an'ny fireneny. Ny mpaminany ho antsika dia ny mahalala ny hoavy nefa tsy izany ny tena fototra, ny voalohany ny mpaminany dia izay mahalala ny sitrak'Andriamanitra sy mizara izany amin'ny mpiara-belona aminy.

I Jeremia dia nirahin'Andriamanitra hanambara ny sitrak'Andriamanitra amin'ny vahoakany. Izany koa i Jesoa ao amin'ny Evanjely. Toteny teo amin'ny olona i Jesoa ka gaga ireo nahita azy ka velompanontaniana hoe “ Iza io, tsy zanak'i Josefa ve io, tsy eto amintsika ve ny rahalahiny, ny anabaviny ?” Izany indrindra no fampianarana voalohany ho antsika dia hirahin'Andriamanitra isika hampivondrona sy hampiombona ny vahoakany. Aza gaga isika fa misy ireo manodidina antsika, misy ireo akaiky antsika indrindra no manaratsy ary manatsatso fa iza moa io no mba mianakendry satria isika mijoro manambara ny sitrak'Andriamanitra. Ary ny sitrak'Andriamanitra dia mifototra amin'ny zavatra telo lazain'I Md Paoly amin'ny vakiteny faharoa.

Voalohany dia ny fitiavana, endrik'andriamanitra isika ka-mampianatra antsika mifankatia izany hoe hanasoa ny hafa, hahafoy ho an'ny hafa ary io no hahafahana manorina fiainana vaovao, izany no maha génération mpanorina antsika satria mifanasoa, mahafoy ho an'ny hafa. Fantantsika fa amin'ny fanorenana ataontsika dia mila mijery akaiky ny tontolo iainantsika isika tontolo iainana izay efa potika fomba anankiray fototra hanehoana ny fitiavana ny fikolokoloana azy? Tsy tanteraka izany raha tsy mahafoy fotoana amin'ny fikarakarana azy, mikolokolo sy miaro azy, atao izay mahalavitra azy ny afo sy ny kapa ala fanaontsika ireny. Fantantsika fa raha mikapa ala isika dia mamono ny aina satria tsy misy ny rano, hitantsika ny vokadratsin'izany, ireo fahitana ny zerikana mavo milahatra satria tsy ampy intsony ny rano. Ny fampanjakana ny fitiavana, ny fahafoizana, ny fiarovana ny ala mba tsy ho potika, raha miaro ny ala isika dia miaro ny aina satria izay mandoro tanety tsy hoe mamono tanindrazana fa mamono aina, mamono taranaka. Noho ny fitiavana, fahafoizana, noho isika mitady soa ho an'ny hafa dia vonona koa mikolokolo ny tontolom-piainantsika.

Ny faharoa ambaran'i Md Paoly dia ny fahamarinana, vokatry ny maha mpaminany antsika dia ny mizara ny sitrak'Andriamanitra ka mijoro amin'ny fahamarinana, vokatry ny fitiavana izany. Marina ihany no hahafahantsika mampijoro ny fiainana vaovao Ny fampanjaka ny rariny sy ny hitsiny vokatry ny fitiavana sy fahamarinana ao anatin'ny fihavanana sy fifampitokisana no mitondra antsika ho taranaka mpanorina tokoa. Tsy misy ny fifampitokisana raha tsy ao ny marina.

Ny fahatelo ampianarin'I Md Paoly antsika dia ny fanantenana, vokatry ny finoana ny tontolom-pinoantsika dia feno fanantenana isika satria mampianatra antsika hiombona aminy i Jesoa, ho olo araiky amin'Andriamanitra isika ka feno fanantenana. Izany no fiadanana ampianarin'I Jesoa Kristy antsika. Tsy ilay fiadanan'izao tontolo izay fandriam-pahalemana vokatry ny hetraketra sy fanjakazakana matetika fa ny tontolom-pinoana mampianatra antsika ilay fiadanana izay ambaran'I Jesoa nandresy ny fahafatesana ka noho izany dia feno fanantenana isika satria mazava ny ho avy. Tsy fahafantrana ny ho avy no mampitebiteby ka mahavery ny fanantenana.

Ny fotopampianarana tian'ny Eglizy aroso amintsika amin'izao Alahady faha 4 mandavantaona izao dia antsoina isika ho mpaminany tahaka an'I Jeremia, hampivondrona ny vahoaka. Antsoina isika ho mpaminany ho an'ny firenena na dia sarotra aza izany.

Na i Jesoa aza rehefa nijoro nanambara ny sitrak'Andriamanitra dia nisy nanenjika, aza gaga isika amin'ny fiainantsika ny finoana raha misy manenjika satria vavolombelona isika manambara ny maha zanak'Andriamanitra dia tsy maintsy misy manatsatso na manaratsy. Entanim-pinoana isika dia araky ny lazain'i Md Paoly entanin'ilay fitiavana satria noharian'Andriamanitra hitovy endrika

amin'ny ka manambara ny endrik'Andriamanitra amin'ny mpiara-belona, ambarantsika amin'ny ataontsika rehetra. Ny fitiavana dia fahafoizana, hanompo sy hanao soa ny hafa ary izany no entintsika mampijoro ny génération mpanorina antsika, ilay fanorenana ny tontolo iainana ka hiarovantsika ny zava-boahary. Ny fanorenana ny tontolom-piainana ao anatin'ny fahamarinana ary ny tontolom-pinoana ao anatin'ny fanantenana.

Ry Jesoa Tompo ô, teo anivon'ny mpiara-belona aminao dia maro ny olona tsy nahatsapa na nahafantatra fa ianao tokoa no làlana sy fahamarinana ary ny fiainana. Amin'izao izahay maniry ho génération mpanorina izay hahatonga anay ho mpanorina Eglizy Tranon'Andriamanitra sy Eglizy Olona Velona, enga anie hirotsaka aminay ny fahasovanao sy ny Fanahinao masina hahafahanay mandresy ireny toetra mahatonga anay ho mpandrava sy mpanakorontana ary feno avonavona sy fitiavan-tena, ho resinay ireny ka ho zary zanak'Andriamanitra tokoa ny fiainanay, ho Kristy mpiara-belona izahay, ho mpaminany hizara fahamarinana sy fanantenana sy mizara fitiavana eo amin'ny manodidina anay araky ny torohevitra arosan'ny Eglizy androany, ho fianakaviana iray ao aminao ho olo araiky ao aminao tokoa izahay satria "Masoandro be lohataona ny fitiavan'Andriamanitra ka tsy mifidy olona hosoavina" Amen

Mompera Arseveka Benjamin Ramarosan